

GEORGICON II

interea dulces pendent circum oscula nati,
 casta pudicitiam seruat domus, ubera uaccae
 lactea demittunt, pinguesque in gramine laeto 525
 inter se aduersis luctantur cornibus haedi.

ipse dies agit festos fususque per herbam,
 ignis ubi in medio et socii cratera coronant,
 te libans, Lenae, uocat pecorisque magistris
 uelocis iaculi certamina ponit in ulmo, 530

corporaque agresti nudant praedura palaestra.
 hanc olim ueteres uitam coluere Sabini,
 hanc Remus et frater; sic fortis Etruria creuit
 scilicet et rerum facta est pulcherrima Roma,
 septemque una sibi muro circumdedit arces. 535

ante etiam sceptrum Dictaei regis et ante
 impia quam caesis gens est epulata iuuenis,
 aureus hanc uitam in terris Saturnus agebat;
 necdum etiam audierant inflari classica, necdum
 impositos duris crepitare incudibus ensis. 540

Sed nos immensum spatiis confecimus aequor,
 et iam tempus equum fumantia soluere colla.